

Gonçalez de Montoro e otros, e yo Lope Sanchiz de Valençia escrivano de nuestro señor el rey e su notario publico en la su corte e en todos sus reynos, e ley e conçerte este dito e fiz aqui mio signo en testimonio de verdat. Lope Sanchiz.

VIII

1407-I-22, Segovia.— Juan II ordenando que dejen entrar en la ciudad a D. Juan Sanchez Manuel. (A.M.M. Cart. Real 1391-1412, fol. 10r.)

Publicada por PASCUAL MARTÍNEZ, L. en La cancilleria Real Castellana durante la regencia de Don Fernando de Antequera. Miscelanea Medieval Murciana. 1984. V.XI, pág. 177-236.

Yo el rey, con acuerdo e confero, e abtoridad de la reyna mi madre, mi tutora, e del Infante don Ferrando, mi tio e mi tutor, e mis regidores, fago saber a vos, el conçeio e cavalleros, e escuderos, e ofiçiales, e omes buenos de la çibdat de Murçia, que Iohan Sanchez Manuel se me querello e dize que puede aver seys años que anda fuera de la çibdat por algunas enformaçiones que dél fueron fechas al rey mi padre e mi señor, que Dios de Santo Parayso (aya), de las quales non se fallo quel dicho Iohan Sanchez fuese en culpa, e pidiome por merçed, que lo enbiase leçençiado para a su casa e yo veyendo que me pedia razon e justiçia tovelo por bien.

Porque vos mando, vista este mi alvala que acogades al dicho Iohan Sanchez Manuel en esa dicha çibdat e lo dexedes e consyntades bevir en lo suyo, e estar en su casa como antes estava, e non fagades ende por alguna manera so pena de la mi merçed e de diez mill maravedis para la mi camara a cada uno por quien fincar de lo ansi fazer e conplir, mando al ome que vos este mi alvala mostrare que vos enplaze que parescades ante mi en la mi corte personalmente del dia que vos enplazare fasta quince dias primeros siguientes a dezir porque razon non conplides mio mandado, e de como este mi alvala vos fuere mostrada e los unos e los otros la cunplieredes mando sola dicha pena a qualquier escrivano publico que para esto fuere llamado que de ende al que vos la mostrare testimonio signado con su signo porque yo sepa en como conplides mio mandado; el alvala leyda, dadgela.

Dada en la çibdad de Segovia, veynte e dos dias de Enero año del nascimiento del nuestro Salvador Ihesuchristo de mill e quatroçientos e siete años. Yo la Reyna. Yo el Infante. Yo Iohan Garçia la fize escribir por mandado de nuestros señores la reyna e el Infante, tutores de nuestro señor el rey e regidores de sus reynos. En las espaldas de la dicha carta dezia: Registrada.

